

史記志疑

史記志疑卷十五

梁玉繩

禮書第一

而六國畔逆

案六乃七字之誤正義甚謬

事在袁盎語中

案盎傳止載解七國之策不及誅鼂錯事故盎傳云其語具在吳事中則此處當云事在袁盎吳王語中絳侯世家言立孝文云其語在呂后孝文事中是其例也

禮由人起

附案史公禮書惟存一序此下皆後人因其缺而取荀子續之自禮由人起至儒墨之分及天地者生之本至末是荀子禮論中間治辨之極至刑錯而不用是議兵篇答陳轅誼索隱

論非禮而末段又割截禮論橫加太史公曰四字以作論尤為乖陋。

樂書第二

太史公曰余每讀虞書

附樂書全缺此乃後人所補託之太史公也以序言之其曰仲尼作五章以刺時不知所指索隱謂卽彼婦之歌殊未確便如其說此歌止可五章之一不得遂該五章也其曰李斯諫二世放棄詩書夫斯議焚書安能有是諫縱有是諫亦決非李斯也其曰高祖過沛詩三侯之章大風歌有三兮而無三侯明方以智通雅四謂兮與侯古通用但侯乃發語辭與兮字不全也其曰今上作十九章令李延年次序其聲而漢志武帝時作安世房中歌十七章郊祀歌十九章以此爲

房中樂歟不可言十九以爲郊祀樂歟則十九章并太始三年赤蛟歌數之又非史公所及觀蓋史公作史時尚未定十九章之名索隱未經細究遽云房中樂有十九章妄矣且全爲郊祀歌何以止載四時太一天馬六章而太一歌不但字有增換并刪去志俶儻四句天馬歌全與漢志別俱不可曉漢志天馬歌凡六章此獨載蒲梢之歌其事他無所見而蒲梢亦云天馬首尾四語又與天馬歌首章相似疑此是詠烏孫馬漢書不載補史者別記所聞謬以爲宛馬歌耳大宛傳言天子得烏孫馬好名曰天馬及得大宛汗血馬更名烏孫馬曰西極名大宛馬曰天馬或者蒲梢乃烏孫馬之歌而歌中有天馬來從西極之句故名爲西極耶

漢書武紀稱宛馬歌爲西極天馬之

歌亦因歌有西極語

其曰中尉汲黯譏馬歌丞相公孫宏謂黯誹謗聖

制當族考馬生渥洼水作歌在元鼎四年之秋武紀可證禮
樂志誤以爲元狩三年其所以誤者因元狩二年曾得馬余
吾水中遂移屬于渥洼耳獲宛馬作歌在太初四年之春而
公孫宏卒于元狩二年三月不但渥洼大宛事不及見卽不
作歌詩之余吾馬亦不及見得余吾馬在元狩二年夏安得有誹謗聖制
之語哉黯未嘗爲中尉之官得渥洼馬時黯在淮陽爲太守
無緣面譏武帝得大宛馬時黯卒已十二年卒于元鼎五年又安得
誹謗聖制哉困學紀聞通鑑答問謂樂書後人所續厚誣古
人非史遷之筆豈有遷在當時而乖舛如此通鑑考異不得
其說疑馬生渥洼作歌在元狩三年汲黯爲右內史而譏之
言當族者非公孫宏殊不然也至樂書中段旣直寫樂記而
增易升降絕無意義濮水聞琴節又撓用韓子十過篇末段

尤爲冗濫。徐氏測議謂是截舊文爲之前後兩書。太史公曰。又稱武帝爲今上。僞亂其詞。欲以假冒真。而不知其不能混爾。

律書第三

兼列邦士

案士一本作土。古字通用。非譌也。說在始皇紀論。但邦字犯諱。何以不之字曰國。

遂執不移等哉

附案史記曰。湖本執作執誤。

天下殷富粟至十餘錢

案粟下或斗或斛。必有缺文。

孔子所稱有德君子者邪

案律爲兵家所重故史公序律先言兵昔賢謂律書卽兵書是已然言用兵之事幾七百言未免于律意太遠且祇述歷代之用兵而不詳其制又不及漢景武兩朝毋乃疎乎書曰七正二十八舍

附案已下當提行寫但此語與下文不相貫嘉興王氏元昉史記正義謂是後引書璇璣之錯簡尚有脫字當云太史公曰書曰在璇璣玉衡以齊七政七正歷二十八舍言二十八舍七政皆周歷之也余甚疑之故或謂此語乃引尚書固非或謂引當時律家之書如律歷志稱書曰先其算命之類亦非師古以爲至續古今攷以二十八舍指日中星鳥四句尤謬

律歷天所以通五行八正之氣天所以成熟萬物也舍者日月

所舍舍者舒氣也

附案此語與前後文亦不貫正譌謂律歷二十字乃論中建律運歷造日度之注氣下當有日度二字而舍者十一字爲二十八舍之注傳寫者不察攙入本文也

不周風居西北

案淮南天文訓白虎通八風篇言八風各距四十五日而至左傳昭二十年疏引易緯通卦驗言風之至以四立二分二至極爲有理乃此所說八風有一風主一月者主兩月者獨涼風主六七八三月深所未曉又營室柳胃婁奎之解與天官書不全二十八宿無斗井鬼背而有建弧狼分罰參爲二宿亦不可解

十二月

附案缺也字

大呂者其於十二子爲丑丑者紐也言陽氣在上未降萬物厄

紐未敢出

缺也字

附案正義曰徐廣云此中闕不說大呂及丑案一本云丑者紐也言陽氣在上未降萬物厄紐未敢出也据此則釋丑之義後人依別本補入而大呂一律仍缺史詮以漢志補之曰大呂者旅也言陰大旅助黃鐘宣氣而牙物也

西至于七星

附案續古今攷曰井鬼柳星張翼軫古次序如此今七星在張之前何也正譌曰西至于張十二字錯簡在七星後

地者沈羣萬物氣也

附案正義謂沈一作洗當是此篇所釋多以叶聲取義故于

地言洗

其於十二子爲未

附案此獨不言其於十母爲戌已者缺文也。漢志但云豐楙於戌理紀於已。與此篇文法不類。余取劉熙釋名補之曰。戌茂也。物皆茂盛也。已紀也。皆有定形可紀識也。

北至于罰

案書中述二十八宿以建易斗。蓋謂建星在斗之虛故也。以弧狼易井鬼。蓋謂弧狼近井鬼之虛。且與鬼四星三度太狹。東井八星三十四度太廣。故不書井鬼而別取弧狼。但狼一星在東井赤道外。弧九星六星如弓背。三星如弓之挾矢以射乎狼。弧矢在天狼之後。今以弧爲落物就死尚近。以狼爲量斷萬物何歟。參伐一也。

伐罰古通。天官書天文志可證。

此增出罰星。則是

二十九宿矣故去觜以合其數而罰實不可以代觜前人有謂北至于罰十四字當衍去而補觜觿一宿良是

黃鐘長八寸七分一宮大呂長七寸五分三分一太簇長七寸七分二角夾鐘長六寸一分三分一姑洗長六寸七分四羽仲呂長五寸九分三分二徵蕤賓長五寸六分三分一林鐘長五寸七分四角夷則長五寸四分三分二商南呂長四寸七分八微無射長四寸四分三分二應鐘長四寸二分三分二羽

案夢溪筆談謂餘分下分數目凡七字皆當作十字誤屈其中畫耳黃鐘八寸十分一太簇七寸十分二姑洗六寸十分四林鐘五寸十分四南呂四寸十分八宋蔡元定律呂新書因之皆改七分爲十分然索隱已先言七分爲誤矣又新書改大呂爲七寸五分三分二夾鐘爲六寸七分三分一蕤賓

爲五寸六分三分二夷則爲五寸三分二

五寸三分二當作兩空

也又云黃鐘下有宮太簇下有商

蔡据宋本作商姑洗下有

羽林鐘下有角南呂下有徵晉志論律書五音相生而以宮

生角角生商商生徵徵生羽羽生宮求其理用罔見通途者

是也仲呂下有徵夷則下有商應鐘下有羽三者未詳疑後

人誤增蔡氏之說如此

史詮正譌亦以徵商羽三字疑衍從蔡氏也

而史詮曰太

簇角當作商姑洗羽當作角林鐘角當作徵南呂徵當作羽

俱後人傳寫之誤要之史公所記分寸之數配合之數與管

子呂覽淮南及漢晉以來諸志皆不全而後人議之者甚衆

展轉糾繆莫適是非蒙不知律未敢妄談姑取先儒所改政

者著之以俟專家質焉昔高誘注淮南不解鐘律上下相生

之法置而不說余竊全之矣

生黃鐘 術曰

附案正譌謂黃字衍前言生鐘分是諸律積實之數此言生鐘術是彼此相生之法佈算之道先審其實而後用法歸之故先言分後言術舊本割去術字連下曰字爲句非是然書但言實如法得一凡得九寸命曰黃鐘之宮下不悉數卽以爲生黃鐘亦可舉一以概其餘也

上九商八羽七角六宮五徵九

附案索隱謂此文數錯未暇研覈錢宮詹語余曰此六十律旋相爲宮之法族子塘以揚子太元淮南天文訓證之無不照合蒙著攷異推行甚詳史公不誤也然唐以後人罕有通其義者

置一而九三之以爲法

附案史記攷異曰此下當云十一三之以爲實轉寫脫之非其聖心以乘聰明

附案其字當依明監本作有正義引此亦作有一本作具非太史公曰故旋璣玉衡以齊七政卽天地二十八宿

附案故者因上接下之詞非可用爲發語正義謂故字誤當從尚書作在也又以前文書曰七正二十八舍句移此以書曰二字置句首正與政通正下脫歷字而以卽天地二十八宿句與前文舍者日月所舍十一字屬此二十八舍之注又地字誤當作之觀文尋義王氏說頗協王孝廉云故字疑政之訛亦通

造曰度

附案曰卽日字非誤也開口爲日合口爲曰不以廣狹字形論也史詮以日爲日之誤蓋未攷古書法

歷書第四

昔自在古

案史公歷書缺惟存前序然篇首昔自在古至難成矣百餘字乃大戴禮諸志篇孔子稱周太史之語而倒亂先後改易字句不可解

太史公曰神農以前尚矣

附案太史公曰當接上文順承厥意各本提行寫非
蓋皇帝考定星歷

附案皇黃古通索隱本作黃帝

年者禪舜申戒文祖云天之歷數在爾躬舜亦以命禹

史記考要曰堯舜禹以天之歷數相告戒朱子謂帝王相繼之次第猶歲時氣節之先後遷固直以此爲造歷之事非也

周襄王二十六年閏三月而春秋非之

案東遷已後王不頒朔而國自爲歷各有不齊春秋之非閏三月謂魯歷也史公以爲周歷誤

歸邪於終

附案集解音邪爲餘蓋古音通借也衛風其虛其邪魯頌詩無邪皆叶六魚可證

是時獨有鄒衍明於五德之傳而散消息之分以顯諸侯而亦因秦滅六國兵戎極煩

附案徐氏測議曰以顯諸侯下未宜遽入秦事又文法錯互當是殘缺數語耳

詳林亦云因下有缺文

漢興高祖曰北時待我而起亦自以爲獲水德之瑞雖明習歷及張蒼等咸以爲然

案漢之王或以土德或以火德或以水德所說不全而水德之說尤妄語在孝文事中

後作亂

案新垣平非作亂也以詐妄誅耳

未能詹也

附案徐廣詹作售是漢書作讎卽售也

名察度驗

附案漢志作名察發驗

朕唯未能循明也

附案正譌曰循當從漢書作修

歷術甲子篇

附案此乃當時歷家之書後人因本書之缺謬附于史增入

太初等年號年數其所說歷法仍是古四分之術非鄧平落
下閏所更定之太初歷也起焉逢攝提格太初元年至祝犁
大荒落建始四年歷家一節之法也所載歲名與爾雅全
別不止與天官書異者有四也天漢三年赤奮若太始二年
並誤此据索隱說今本俱非其史訖太初而敘至成帝建始
舊蓋唐以後人因其誤而改之
非妄續之的證耶其他所算餘分或大餘小餘并篇末述干
支之名多有差脫不復詳辨蓋太初定歷別有成書史公作
史時未經錄入孟堅作志載三統而又不載太初其法遂無
傳矣

天官書第五

中宮天極星

案天官書似缺前序又史記攷異曰此中宮及東宮南宮西

宮北宮五官字皆當作五官下文云天之五官坐位可證史公本文皆作官矣

旁三星三公或曰子屬

邵氏疑問曰帝星前一星曰太子後二星曰庶子后非旁三星也亦非三公也子屬是也

後句四星末大星正妃餘三星後宮之屬也

案星經及晉隋志後句四星曰四輔所以輔佐北極而出度授政也無正妃後宮之說

隨北端兌

附案隨乃隋之譌湯果反垂下也索隱本作隋斗蓋舊本多作斗故小司馬引劉氏云斗一作北并引漢志作北爲證必後人知斗爲誤改從北字

紫宮左三星曰天槍右五星曰天棓

附案方氏補正曰槍在紫宮之右棓在左疑傳寫誤詩緯云
在杓左右益誤矣漢志言右四星非

四曰司命五曰司中六曰司祿

附案漢志五司祿六司災晉以下志皆作四曰司祿五曰司
命六曰司寇與此不全

輔星

案馬續天文志輔星上有柄字此缺漢天文志成于馬續故
晉志引之稱馬續云

有句圖十五星屬杓

附案正譌曰句七星曰七公圖八星曰貫索貫索本九星正
北一星常隱不見見則反以爲變故與七公竝數得十五星

舊注專指貫索則但有圓星無句星矣

房爲府曰天駟其陰右驂

案府上有天字索隱本及御覽卷五竝作天府也而右上缺左字房北左右各四星名東咸西咸卽左右驂也晉志又云南星曰左驂次左服次右服次右驂

東北曲十二星曰旗旗中四星曰天市中六星曰市樓

案天市垣左右之星曰旗共二十二非十二也曲下缺二字

天旗南北門左右各兩星爲天市中有六星爲市樓

漢志無市樓句

正義引左右旗各九星乃北宮之星奈何以爲天市旗哉余詢之知星者云

尾爲九子曰君臣斥絕不和箕爲敖客曰口舌

王孝廉曰尾主後宮豈君臣之重而尾足以當之疑君臣乃

羣姬之譌尾星斥絕則羣姬不和矣漢志敖客下有后妃之府四字

門內六星諸侯

案垣內五諸侯五星史漢俱誤作六星

後聚一十五星蔚然曰郎位

附案蔚然徐廣作哀鳥與漢志全星經及晉隋志作依鳥依亦音哀皆星之貌狀唐儲光羲述韋昭應畫屏牛詩作衰鳥郎乃傳刻之譌也後書楊秉傳注引天官書作二十五星亦譌

皆羣下從謀也

附案漢志從上有不字恐非

廷藩西有隋星五曰少微士大夫

疑問曰隋者垣西四星南北列曰少微非五星也

漢晉志云四星

東井爲水事

案漢志此下有云火入之一星居其左右天子且以火爲敗疑此缺

與鬼鬼祠事

附案以下文主急事等例之疑是主祠事之誤古主字作一轉相傳寫認爲上鬼字省文遂重作鬼爾

七星頸爲員官

附案宮字譌官索隱本作宮漢以後志皆然

其旁有一小星曰長沙星

疑問曰軫中有星曰長沙非旁也

無處車馬

附案漢志馬作焉是此譌

下有四星曰弧

案弧九星言四星誤

狼比地有大星曰南極老人

案狼字衍漢志無之晉志弧九星在狼東南老人一星在弧南則豈與狼比地哉南極星中原常不見

附耳入畢中兵起

附案漢志無此七字正譌曰此後人增入者余疑當在前文爲附耳句下錯簡也

軍西爲壘或曰鉞

案晉志壘壁陳十二星在羽林北則西字乃北之誤鉞爲星之異名漢志作戌今本解者或以爲壁星或以爲鉞鉞星甚

且據漢志譌本以爲戍守之意反謂鉞爲譌字竝妄

危東六星兩兩相比曰司空

案司空漢志作司寇然司寇司寇皆不在危東亦非六星也
正義疑命字誤空然虛東危西兩兩相比者乃司命司祿司
危司非八星無所謂危東六星亦不得專指司命二星爲說
也恐本文有誤

營室爲清廟曰離宮閣道

案此下宜列東壁一宿蓋二十八宿爲經星史及漢志於他
宿備載無遺獨缺東壁何歟正義從晉志補十五字云東壁
二星主文章天下圖書之秘府也

杵臼四星在危南

案星經曰四星杵三星在人星旁蓋危星之北此言危南四

星恐誤也。

牽牛爲犧牲其北河鼓

案爾雅河鼓謂之牽牛。故荆楚人呼牽牛爲檐鼓。是一星兩名也。而星經及漢已下諸志皆分爲二。邢昺疏亦不能知其全異。河當作何。與荷通。梁宗懷荆楚歲時記。黃姑織女時相見。卽何鼓之譌。南唐李後主詩。迢迢牽牛星。杳在河之陽。案案黃姑女。耿耿遙相望。誤也。

織女天女孫也

附案徐廣謂孫一作名是也。索隱引荊州占曰。織女一名天女。星經及晉隋志亦云天女。此孫字誤。然因此之誤。而後世遂有天孫之號。

察日月之行以揆歲星順逆

附案此下敘五星以漢志校之字句多有增損移易凡于義得通者略而不說蓋各有所傳不能無小異也

義失者罰出歲星

案漢志歲星仁也太白義也此以歲星爲義何歟

漢以來諸志亦兼載

從歲以義之說

正月與斗牽牛晨出東方

附案史記攷異曰淮南天文訓在十一月此云正月者史公據石氏星經較淮南書每後兩月

歲星出東行十二度百日而止逆行八度百日復東行歲行三十度十六分度之七率日行十二分度之一十二歲而周天出常東方以晨入於西方用昏

案此節綴于攝提格歲一段之後明是錯簡當移在上文義

致天下句下又正譌以漢志五步攷之多有不全蓋歷法積久愈精析其奇零之數比前加密故與志異下倣此

名曰降入

案上文已言與婺女虛危晨出曰降入則此四字爲誤重下文曰青章曰大章亦然皆當衍

以三月居

義門讀書記曰居字疑衍

以四月與奎婁胃昂晨出曰踳踵

案五月歲星與胃昂畢晨出若四月安得與胃昂出乎二字衍漢志淮南子俱無之踳踵據集解索隱史漢舊竝作路踵也各本集解

爲峰

其失次有應見亢

正義曰。他歲皆有歲星失次之應。及水旱之占。獨其在己未申亥子丑者。但言失次。不言水旱。漢志并不著失次之語。未詳其義云何。

曰大音昭昭白

案大音漢志作天晉。蓋音字。今本之誤。白下當有色字。爲長王。

案爲字衍。漢志作長王疑譌。

有旱而昌

案四字亦衍文。漢志無之。或曰有譌脫。

大章

案漢志作天皇。徐廣全今本史注或作大星或作大皇並譌則作大章誤。

以十一月與氏房心晨出曰天泉

案漢志泉作宗

在昴

正譌曰在當作見

其失次舍以下進而東北三月

漢志凡三月上皆作不出三月廿氏說也

生天棓長

四尺

晉志作丈

末兌進而東南三月生彗星長二丈類彗星

星字衍

退

而西北三月生天棓長四丈末兌退而西南三月生天棓長數丈兩頭兌

附案天棓天槍名見恆星中此則歲星所生也宣城吳氏肅

公天官考異曰歲星所變妖星非紫宮中天棓天槍

以其舍命國熒惑熒惑爲勃亂殘賊疾喪饑兵

勃全

附案史詮補正皆云命國下衍熒惑二字徐廣謂饑兵下一
本有熒惑爲理外則理兵內則理政三句正譌曰後有熒惑

爲李李字諶宜作理蓋因理外則理兵內則理政故曰雖有明天子必視熒惑所在二十五字錯簡在後當移于命國下而熒惑二字卽爲理數語之遺逸不盡者正譌言是用戰順之勝逆之敗

正譌曰漢志在其野者亡地以戰不勝與此異義其八守犯太微軒轅管室主命惡之

案漢志無此語疑衍補正曰命令所從出者天下則天子一國則諸侯軒轅主後宮太微非犯帝座亦不應占主命者歲行十二度百十二分度之五

正譌曰十二度當作十三度

其下之國可重致天下禮德義殺刑盡失而填星乃爲之動搖案填星爲信而仁義禮智以信爲主故以信爲重漢志亦云

從填以重也。德字當衍義乃仁之誤。宜云仁禮殺刑盡失。蓋歲星爲仁。熒惑爲禮。太白爲義。辰星爲智。殺卽義。刑卽智。故漢志云從太白以兵從辰以法。

填星其色黃九芒音曰黃鐘宮

一本九作光非

附案此文上下俱論填星之盈縮無緣夾入。必是錯簡。正義移在前文。其一名曰地侯主歲之上當是也。

木星與土合

案此下總論五星當別爲一條。漢志列辰星條後是也。此誤連填星條之後。又此句當作凡五星木與土合。故正義引星經云凡五星木與土合皆有凡五星三字。可知此木星二字當乙凡五二字當補。

若水金在南

附案水乃木之訛漢晉志作為水亦非

生孽卿

附案他本生作主字是

大饑

附案正義引星經云火與木合饑漢志亦然則大字乃木之
譌二字作二句讀

戰敗為北軍軍困

附案補正曰凡三占以戰則敗又為奔北之軍又為軍見困
于敵也

七寸以內必之矣

案漢晉諸志此句上有云二星相近者其殃大二星相遠者

殃無傷也似不可省。

意行窮兵之所終

案此七字其義未詳。漢晉諸志無之。據辰星條有云赤行窮兵之所終。則意乃赤之訛。徐廣作志亦非。但赤角之應已見上文。不宜複出。疑有脫誤。卽赤行七字亦不可曉。正譌直定爲衍文。

月行及天矢

正譌曰。此卽後文所謂出蚤爲月蝕。晚爲天矢及彗也。誤衍于此。又逸其半而加譌舛焉。

下起兵

附案天下起兵各本脫天字。

國以靜

附案國當作圖各本譌刻

黑圓角憂有水事青圓小角憂有木事黃圓和角有土事有年
正譌曰圓則不角角則不圓兩圓字一小字皆衍圓和二字
當在有土事下和謂色不怒正義不得其讀而誤解也

其已出三日

案漢志此上有云入七日復出將軍戰死入十日復出相死
之入又復出人君惡之此缺

是謂爽

案漢志作爽而伏晉灼曰爽退也伏不見也此亦缺
其色大圓黃澤可爲好事其圖大赤兵盛不戰

附案十八字當在上文有年句下錯簡于此蓋上文言赤角
有戰黃角有土事圖和有年則此所占當類從

太白白比狼赤比心黃比參左肩蒼比參右肩黑比奎大星
案二十三字正譌謂當在總論五星條內無德受殃若亡之
下誤屬于此太白二字亦誤當改作五星蓋是也又左右二
字應互易

居實有得也居虛無得也行勝色色勝位有位勝無位有色勝

無色行得盡勝之

晉志得作德晉書
引星經亦作德

案正譌移此文于總論五星條內接黑比奎大星下蓋據晉
志是也而於此文上從漢志補凡五星所出所直之辰其國
爲得位得位者戰勝所直之辰順其色而角者勝其色害者
敗三十五字并云上文所直之辰謂得位也順色而角謂有
色也居實有得則所謂行得也今本脫去凡五星已下三十
五字則行色位等字皆無來歷今從漢志增入但漢志移置

五星白比狼之上文義乖隔不順晉志先敘星色然後及所出所直之辰而於色害者敗之下接居實云云爲得其序又此條舊屬太白條下故五星字俱誤作太白漢書亦仍其謬今詳其義實係總論五星故依晉志更太白字爲五星未盡其曰過參天

附案漢晉志作期日是也

金木星合光其下戰不合

正譌曰木當作水總論五星獨不言金水相合之應以其見于此也

太白伏也

附案正譌曰也字當加土作地謂入地不見也

仲春春分夕出郊奎婁胃東五舍

附案以後文宜效不效句觀之則此及下三郊字乃效之譌正義曰效見也

辰星來抵太白太白不去將死正句旗上出破軍殺將客勝下出客亡地視旗所指以命破軍

案此言太白不去漢志作辰星來抵太白不去無複出太白字則謂辰星不去也依志爲是又兩旗字志皆作其亦謂辰星正義不知史誤解爲星名索隱又解爲太白芒角似旗謬矣但其上出十五字與上文複疑衍

其繞環太白若與鬪大戰客勝免過太白閒可械劍小戰客勝免居太白前軍罷出太白左小戰摩太白有數萬人戰

案漢志大戰客勝下有主人更死句免居太白前下有句三

日句

免爲辰星之別名與免全但此下忽易其名稱免何也

此缺不具摩太白右此誤

右爲有湖本卽以有連下讀謬矣

青角兵憂黑角水赤行窮兵之所終

案史詮謂此文當在後白角號泣之聲下是也但赤行七字未詳其義說見上

角亢氏克州房心豫州尾箕幽州斗江湖牽牛婺女楊州虛危

青州管室至東壁井州

至爲室之半傳寫誤重當衍

奎婁胃徐州昂畢冀州

觜觿參益州東井與鬼雍州柳七星張三河翼軫荊州

附案本書于中宮條內謂用昏建者杓杓自華以西南夜半

建者衡衡殷中州河濟之間平旦建者魁魁海岱以東北是

以北斗言分野也此云角亢氏克州等是以二十八宿言分

野也下文甲乙丙丁之占是以日時言分野也

漢志又有甲齊等五十五

字秦侯太白諸語是以五星言分野也界華夷爲陰陽是以

畢昴天街言分野也。夫列宿主十二州而斗之七星亦各有屬。奚獨杓衡魁三星而已乎。天街分國陰陽理固有之。卽上文所稱畢昴閒爲天街其陰陰國陽陽國也。然謂畢昴二星主華夷實未所聞。若五星占候以及支干日時之配合。竝與二十八宿言分野全義。周禮保章氏以星土辨九州則分野之法自古傳之。左氏內外傳載伶州鳩董因士弱子產裨竈梓慎諸人所論確然可證。但竊有疑者。二十八宿俱主中國。故漢藝文志歷家有海中二十八宿國分臣分二十八卷。豈日星只在中國而不臨四夷哉。疑一。以宿配州。或多或少。地廣者星反少。地狹者星反多。疑二。淮南天文訓漢書地理志以郡國配二十八宿。嗣後言分野者雖有異全。遞爲祖述。唐李淳風僧一行更闡發無遺。而獨不宗史記疑三。漢天文志仍史與地

理志占地于天必天應乎地而始驗乃楊州在南而牛女在
北青州在東而虛危在北冀州在北而昴畢在西雍州在西
而井鬼在南往往相反而不相應疑四故宋周密癸辛雜議
以分野爲疎誕也蓋州郡有廢置封國有變遷安得以屢改
之地占不改之星而星一日移一度一月移一次又安得以
無定之星占常定之地前賢之言分野者甚衆余取三說焉
康成周禮注曰九州諸國中封域于星亦有分焉其書亡矣
堪輿雖有郡國所入度非古數也今其存可言者十二次之
分也孔仲達春秋傳正義曰分郡國以配諸次徒以相傳爲
說其源不可得聞明蘇伯衡平仲集分野論曰分野視分星
古不謂地鄭氏云先星土星所主土是也國在此而星在彼
彼此若不相配而其爲象未嘗不相屬

七星爲員官辰星廟鬚夷星也

附案十二字當在前辰星條末夏則不長之下錯簡於此官乃宮之譌

直爲自立立侯王指暈若曰殺將

正譌曰立侯王漢志作立兵指暈漢志作破軍史誤也若曰二字衍破軍殺將爲句

而食益盡爲主位

正譌曰而益字衍漢志云不然食盡又漢志夏氏日月傳曰日月食盡主位也不盡臣位也據此主位下當補不盡爲臣位五字語乃明白

陰星北三尺

史詮曰陰星下缺多亂二字衍北三尺三字

陽星

案史詮謂此上缺南三尺三字

月食始日五月者六六月者五五月復六六月者一而五月者五凡百一十三月而復始

索隱曰依此文計惟有一百二十一月與元數甚爲懸校旣無太初歷術不可得而推定今以漢志三統歷法計則五月者七六月者一又五月者一六月者五五月者一凡一百三十五月而復始耳或術家各異或傳寫錯謬故此不全無以明知也史記攷異曰本文固有錯謬小司馬所引三統法亦誤今攷三統四分術竝以五月二十三分之二十而一食依次推之則五月者一六月者六又五月者一六月者七又五月者一六月者七凡百三十五月而復始校書家罕通步算

傳寫譌脫莫能是正自昔然矣

故月蝕常也

崇漢志謂天下太平日不食朔月不食望夏氏日月傳曰月食盡主位不盡臣位星傳曰日者德月者刑故日食修德月食修刑自周室衰亂臣賊子師旅數起刑罰失中月之變常見甘石氏見其常然因以爲紀詩云彼月而食則惟其常詩傳曰月食非常也比之日食猶常也謂之小變可也謂之正行非也据此則史公仍甘石之說不自知其誤耳

修德二語亦見管子

四時篇

恆山以北

案恆當避作常

出正東東方之野

附案野字漢志作星下南西北三野字竝全晉隋志或作野或作星義皆通也

去地可六丈大

案漢志云大而黃與前後文大而赤大而白相類此缺而黃二字或謂徐廣大一作六則大字當提行與下節賊星爲一句觀正義稱大賊星一名六賊可證曰以徐注指下節賊星是也以大字與賊星爲句非也蓋此自缺而黃二字下節另脫大字各本誤以徐注屬此耳

賊星

附案脫大字大賊星一名六賊

司危星

附案漢志作司詭疑此脫其半

晉志亦作司危

地維咸光

附案漢隋志作藏光晉志作藏光疑咸字訛

如星非星

附案此當提行寫史漢皆誤連燭星下

星者金之散氣本曰火

案漢志作其本曰人孟康注星石也金石相生人與星氣相應也

集解引

陳則此是誤人爲火江陰趙曦明云人字是所

以下言衆言而少凶也

音在地而下及地其所往者兵發其下

附案下及地乃不及地之譌又漢志往往作住是

類狗所墮及炎火

附案漢志無炎火二字晉隋志無及炎火三字御覽七卷引

此并無所墮及炎火五字

上兌者則有黃色千里破軍殺將

正譌曰者字誤漢志作見又見則二字當著黃色之下史漢竝誤

必有大害

附案漢晉諸志害作客是也此譌楊慎曰星經作客與穫合韻

望之如有毛羽然

案漢晉附志作毛目又一說作尾目

出於有道之國

附案一本出上有常字與漢志合此缺藝文類聚一引史亦有

凡望雲氣

附案此段當以晉隋志參看文詳而語麗

恆山之北

案恆當避作常

卒氣搏

附案搏乃搏之譌下全

前方而高後兌而卑者却

一本高上
有後字

案晉志與史今缺漢志作前方而後高者銳後銳而卑者却氣來卑而循車通者

附案漢志作車道則通乃道字之譌而集解謂車通是車轍避漢武諱改之錢官詹曰說文無轍字車轍之轍亦用徹故裴氏云然韓退之疎于小學諱辨一篇紕繆甚多所云不諱

轍字不足据

十餘里見

附案一本十餘下有二十餘三字與漢志合漢志云十餘二十里見

稍雲精白者

附案漢志作稍雲是也又精當作青

其者抵者

附案抵字譌一本作低是與漢志合

雲搏雨端兌

附案搏雲傳寫訛倒卽上文卒氣搏也

其蛩者

索隱曰蛩亦作蛩

類關旗故

附案漢志作蛩雲者類關旗故蛩此譌關爲關

晉書志亦譌關

故下

脫兌字

諸此雲見以五色合占而澤搏密其見動人及有占兵必起合關其直

附案此以漢晉諸志校之合占之合字衍卽占之誤文複出者及一本作乃是合關之合當作占

下有積錢金寶之

案衍之字

蕭索綸罔

附案綸乃輪之譌漢已下諸志及御覽八引此竝作輪

天雷電蝦虹辟歷夜明者陽氣之動者也

附案正譌曰天字誤當從漢志作夫音扶余攷御覽十三引

此作陰陽之動亦與今本異

孫侍御云蝦漢志作蝦皆霞字之異文

山崩及徙川塞谿垓

附案此段皆用韻語而徙

漢志作徙

垓獨不叶疑徙字有譌

水澹澤竭地長見象

附案此文傳寫錯誤當依漢志作水澹地長澤竭見象

閨臬枯槩

附案上二字誤寫下二字誤倒當依漢志作潤息槩枯文義

始通與上間字亦叶韻

化言誠然

附案嘉定錢教授塘史記釋疑曰四字二韻化卽訛省

立春日四時之卒始也

正譌曰漢志無卒字係衍文索隱蓋曲說

小雨

附案徐廣謂一無此二字是也漢志蓋仍史誤正譌云前後皆言占風不當於此獨兼言占雨索隱亦殊費解

欲終日有雨有雲有風有日日

案正月旦有雲有風有日至今農占謂之三有若雨則爲歲惡也漢志無有雨二字此宜衍有日下亦誤複一日字

則風復起

案則字衍

爲其環城千里內占句則其爲天下候

案漢志城作域無下其字蓋是也

冬至極短縣土炭炭動鹿解角蘭根出泉出

他本作水字是此誤漢志泉水踊

躍略以知日至要泚晷景

附案補正曰冬至日極南晷景極長過此則漸短其物候四

略可以知日至而決其運度要在晷景之長也正義以晷景

連下誤

詳林亦以正義晷景與歲星並注爲誤

殷商巫咸

案巫咸爲殷之賢大臣豈徒傳天數哉天官家稱巫咸蓋後人所託猶封禪書以巫咸爲巫覡史公誤信之耳有說在封禪書中續漢天文志誤仍史云湯則巫咸晉隋志亦然

在齊甘公

案續天文志及晉隋志並以甘德爲齊人而正義引七錄謂楚人蓋本漢藝文志楚有甘公之語也徐廣又云本是魯人未詳孰實

楚唐昧

案昧爲楚將非掌天文之官亦不聞其傳天數豈別有一唐

昧歟昧譌刻昧

日蝕三十六

案元史志載李謙授時歷議作春秋日食三十七事蓋併哀公十四年獲麟後一食數之耳然姜炭一行輩皆言襄公二十一年十月二十四年八月兩次日食不入食限爲史誤書則日蝕之數實止三十四而閻氏尚書疏證云春秋時史失其官開餘乖次卽以日食論二百四十二年當四百八十四交除交而不食及合朔在夜人目不見者以四之一約算仍當一百二十餘日食何三十六之寥寥也困學紀聞六曰春秋十七食是難交而不食此言殆非也

彗星三見

案彗乃孛之誤說在十二侯表中

宋襄公時星隕如雨

案史公以魯僖十五年隕石爲隕星而又以魯莊七年隕星并隕石爲一事故云宋襄公時其誤與宋世家全星隕如雨乃宋閔公五年也

諸侯力政

附案徐廣政作征是也淮南要略云諸侯力征後書襄楷傳諸侯以力征相尚

近世十二諸侯

案當作十三說在表

秦之疆也

附案正譌曰也係地之誤文

災惑爲字

附案此已下至必視熒惑所在當在前熒惑條下說在前

漢之興五星聚于東井

案班書荀紀皆云漢元年冬十月五星聚于東井其實在漢前三年七月卽秦胡亥三年七月紀事者欲明漢瑞移書于元年十月耳史公于天官書張耳傳皆言星聚事而本紀獨不載并不書月日魏高允謂崔浩曰此史謬也案星傳太白辰星常附日而行十月日在尾箕昏沒于申南而東井方出于寅北二星何得背日而行是史官欲神其事不復推之于理浩曰天文欲爲變者何所不可邪允曰此不可以空言爭宜更審之後歲餘浩謂允曰先所論者本不經心及更考究果如君言五星乃以前三月聚東井非十月也衆皆歎服劉攽一作漢天文志刊誤云太白辰星去日率不能一兩次今

十月而從歲星于東井。非其理也。然則五星以秦之十月聚東井耳。秦之十月。今七月。日當在鶉尾。故太白辰星得從歲星也。劉攽之說。本于崔浩。然秦未嘗改月。所說欠明。但古今註謂五星聚非吉祥。乃兵象。爲秦亡之應。因歷引唐世五星聚事爲證。其大者天寶九年五星聚燕。後數歲安史煽禍。中國塗炭。至累世不息。則誠非佳兆。而史傳爲漢瑞。得毋誕乎。通鑑不載。良是。

元光元狩蚩尤之旗再見

案漢書元光元狩之間。無蚩尤旗見事。

星弗于河戒

附案漢志作河戍。疑戒字之譌。南戒爲越門。北戒爲胡門也。楊慎曰。卽唐一行說山河兩戒之戒。一本誤脫戒字。

此五星者天之五佐爲經緯

義門讀書記曰經字疑衍正譌曰正義謂五星行南北爲經東西爲緯五星皆東行逆則西行無所謂南北行此不知經字爲衍文而強爲之說

最近大人之符

附案正譌曰大字誤當作天

蒼帝行德天門爲之開

案此已下既與前文不屬而字句錯雜多不可解正譌謂蒼帝行德天門爲之開赤帝行德天牢爲之空黃帝行德天矢爲之起白帝行德畢昂爲之圓黑帝行德天關爲之動十句移在前文此五者天之感動上蓋言五行感動之理也風從西北來必以庚辛一秋中五至大赦三至小赦凡二十字當

入前文候歲中。然與魏鮮說異。白帝行德四字衍。以正月二十日二十一日月暈圍常大赦凡十六字。乃白帝行德節之注。言月暈圍畢昂開。主有赦令。而常字爲當字之誤。載謂有太陽也。六字亦候歲中注。但載字誤。前文無所謂載也。一曰圖三暮德乃成。不三暮及圍不合德。不成二曰以辰圍不出其句凡二十七字。占星家異說。太史公兼記之。天行德天子更立年不德風雨破石凡十四字。卽前文五帝行德也。索隱三能三有缺文。蓋謂三能三階也。衡者天廷也。客星出天廷有奇令。此十三字。卽南宮條所云衡太微三光之廷也。索隱正義皆不知三能三句有關文。強連三衡爲句。故解費而義晦。正義所說亦未知然否。錄以備參。

史記志疑卷十六

梁玉繩

封禪書第六

自古受命帝王曷嘗不封禪

附案三代以前無封禪乃燕齊方士所偽造昉於秦始侈於漢武此書先雜引鬼神之事比類見義遂因其傳會備錄於篇政以著其妄用意微矣惟牽引郊社巡狩諸典禮未免贖經馬端臨云西漢郊祀襲秦制而雜以方士之說曰太乙曰五帝叢雜而祀之皆謂之郊天史公所序者秦漢不經之祠而以舜類上帝三代郊祀之禮先之至孟堅直名郊祀志於是以前祀六帝爲郊自遷固以來議論相襲而然已或問封禪雖禮經不載然管子莊子韓詩外傳皆言之路史前紀六九謂封禪乃易姓告代之大禮一姓惟一行本晉袁宏後漢紀

續後書祭祀志豈俱不足信歟曰管子雜篇多後人附竄非其本書而管莊於諸子中最顯因竝竄焉故封禪篇管仲諫桓公語與此書無異蓋作偽者造爲成文史全錄之爾有謂取史記補管子者妄管子無所謂封禪篇也梁許懋封禪議見梁書本傳謂管仲設言以屈桓公又取夷吾所記七十二君細數而辨駁之得毋錯認爲真乎皇王大紀曰精懸言可以知史遷著書之謬而不知史遷乃姑妄言之也韓嬰生當其時更無足怪託諸孔氏其誕益明袁宏諸人之說竝無據

至梁父矣

方氏補正曰梁父二字衍曲爲之說終不可通

恒山也

案恒字宜諱

中嶽嵩高也

案中嶽一名霍山一名霍太山亦稱景霍卽禹貢之太岳也
嵩高一名太室卽禹貢之外方也唐虞三代皆以太岳爲中
嶽其證有二周禮冀州山鎮曰霍山又左傳昭四年司馬侯
曰四嶽三塗陽城太室別太室於四嶽之外則嵩高不爲中
嶽可知史蓋緣於爾雅嵩高爲中嶽一語先儒謂釋山後一
條乃漢人所附益不足據依而爾雅之誤當由錯讀詩大雅
崧高維嶽耳山之高者謂之崧詩兼五嶽言之非以太室
山爲嶽名曰崧高也太室爲中嶽莫識所起攷漢武帝元
封元年登禮太室詔有中嶽之稱疑始於是時漢武移南嶽
衡山之祀於天柱安知不易中嶽霍山之祀於太室乎漢儒
依漢事說經故皆誤指嵩高作中嶽也何邵公莊四年公羊
郭景純爾雅山大而高崧注嵩高
山蓋依此名廣韻嵩全崧並非

後十四世至帝孔甲

案後文數殷之世云湯後八世至太戊後十四世至武丁

漢志

亦云八世至太戊而又以十四世至武丁爲十三世誤蓋八世內不數太戊所以自太

戊至武丁爲十四世也乃此言禹後十四世至孔甲

漢志作十三世

仍數孔甲在內故下云其後三世湯伐桀

漢志誤作十三世

何以不

言十三世至孔甲後四世伐桀乎至孔甲太戊武丁武乙紂皆妄稱帝已說在紀中

至帝太戊有桑穀生於廷

附案桑穀事說見殷紀

伊陟贊巫咸巫咸之興自此始

案漢志無下句甚是當時巫家必假咸爲說故史公著此語不然豈未檢書序咸父周書君奭乎

索隱曲說非也

因咸氏巫便以

咸爲巫祝。天官書言巫咸精星象。困學紀聞十。莊子逸篇言黃帝立巫咸。呂氏春秋勿躬篇言巫彭作醫。巫咸作筮。郭璞宏農集。巫咸山賦序言巫咸以鴻術爲堯醫。路史後紀三言神農使巫咸。巫陽主筮。假託古賢。變亂世代。奚足據哉。自有此說。馬鄭注經。皆謂咸是展巫。說文巫咸初作巫。秦詛楚文大神巫咸。竝踵其謬。惟僞孔傳以爲臣名。孔疏曰。咸賢父子爲大臣。必不世作巫官。所見確矣。然傳譌不始於史公。楚辭南華俱以巫咸主神。攷列子黃帝篇有神巫季咸。自齊來處鄭能言人死生壽夭。莊子應帝王亦云。鄭有神巫季咸。得毋屈莊所述巫咸乃鄭巫季咸而遂緣以相思耶。至山海經海外西經所稱巫咸國。大荒西經有十巫。海內北經有六巫。尤荒怪不可信。

自周克殷後十四世

案自武王至幽王凡十一世此言十四漢志作十三竝誤其後十六年秦文公東獵汧渭之間

案十六年當依郊祀志作十四年十二侯年表周平王元年乃秦襄公八年立西時至文公十年作鄜時政十四年則若雄雞

案漢志作雄雉

作鄜時後七十八年秦德公既立

案紀表自秦文公十年作鄜時至德公元年凡八十年此誤漢志自作陳寶後數之謂七十一年是也

作伏祠

案此與漢志祠下竝脫社字年表初作伏祠社可證秦本紀及秦記但云初伏者省不言祠社也

其後六年秦宣公作密時

案四年誤爲六年

其後十四年秦繆公立病臥五日不寤寤乃言夢見上帝上帝

命繆公平晉亂史書而記藏之府而後世皆曰秦繆公上天

漢志

作十三年蓋不數繆公立年也

案趙世家及扁鵲傳備載此事宋葉適習學記言曰此醫師

語也遷載之蕪妄甚矣西京賦有天帝饗穆公一段卽上天

之說明陶宗儀說郛載尚書中候言穆公出狩天大雷有火

化白雀銜絲丹書集於車書言穆公之霸訖胡亥事尤爲詭

異

海內東經注引墨子云秦穆公有明德上帝使句芒賜書十九年其誤政全今本墨子明鬼上作鄭穆公

昔無懷氏封泰山

案漢書人表以無懷氏在伏羲後是也此以無懷在伏羲前

非路史誤仍之

禹封泰山禪會稽

案自無懷氏下十二君惟成王禪社首餘禪云亭山皆不過

其域獨禹禪會稽其地遠不相應豈會稽爲云云之譌乎白

虎通曰三皇禪於繹繹之山

梁書許懋傳
釋又作奕

五帝禪於亭亭之

山三王禪於梁甫之山與僞作管子封禪篇異又墨子兼愛

中篇曰昔武王將事泰山隧若姑妄言之則武王亦嘗有事

泰山也而何以不及

初學記卷五卷十三引史並言黃
帝禪云云與史記管子言亭亭異

兵車之會三而乘車之會六九合諸侯

案此與齊世家全而齊語云兵車之屬六乘車之會三管子

小匡全穀梁莊廿七年傳云衣裳之會十有一兵車之會四

所傳俱誤穀梁數兵車四會曰僖八年於洮十三年於鹹十

五年於牡邱十六年於淮范甯注穀梁數衣裳十一會曰莊
十三年於北杏十四年於鄆十五年復於鄆十六年於幽廿
七年復於幽僖元年於檀二年於貫三年於陽穀五年於首
止七年於甯母九年於葵邱韋昭齊語注數兵車六會曰北
杏二鄆檀鹹淮數乘車三會曰陽穀首止葵邱史索隱正義
本師古漢志注數兵車三會曰莊十三年北杏及僖四年侵
蔡伐楚六年伐鄭數乘車六會曰莊十四鄆十五鄆十六幽
僖五年首止八年洮九年葵邱所說竝異蓋穀梁與韋昭所
數兵車之會統桓公一生而言均有疏舛若史記當斷在會
葵邱前數之也齊語亦當以余攷莊十三年會北杏平宋亂
十四年會伐宋廿八年會救鄭僖元年會救邢四年春侵蔡
伐楚穀梁注疏謂伐楚非會者妄冬會侵陳六年會伐鄭八年會洮定王

室此謂兵車之會八加葵邱後之鹹牡邱淮三會爲十一凡
言兵車會三會四會六者非也至衣裳乘車之會則兩鄆兩
幽檜貫陽穀首止甯母葵邱爲十凡言乘車會三會六衣裳
會十一者非也先儒見所傳各殊不知其謬而又見論語有
九合諸侯不以兵車之文於是紛牽刪掇或不取北杏或不
取貫或不取陽穀而北杏爲會之始貫爲第六會陽穀爲第
七會何故不取或去北杏貫陽穀數洮爲九而洮爲兵車之
會傳有明文安得指爲傳誤諸說並見楊士勛因學紀聞黃氏曰
抄引西疇崔氏謂自莊十六盟幽至會鹹爲九合以牡邱陽
穀淮爲兵車之會而洮鹹之爲兵車穀梁著之陽穀之爲衣
裳范氏稱之西疇豈未檢耶宋陳世崇隨隱漫錄謂左氏莊
十五再會鄆傳曰齊始霸至葵邱爲九而始霸乃左氏一家

之論未足据依。無論前二會不可沒。且十四年會鄆。至十五年復會鄆。一在冬。一在春。相去二三月。可除前此二三月爲非霸乎。有以知其說之不通矣。元俞德鄰佩韋齋輯聞謂十一會中鄆幽再會。其地凡九。故云九合。而會不以地論。更屬臆談也。論語九合。朱子據春秋傳糾合。以爲古字通用。固是。莊子天下篇禹九而實則九合。猶左傳夷於九縣。公羊叛者雜天下之川義全。而實則九合。猶左傳夷於九縣。公羊叛者九國。亦見蔡澤傳。政不必改九爲糾。九之爲言多也。丹鉛錄云。九爲陽數之極。書傳稱九者皆極言之。此解甚愜。若必求以實之。則左傳之九縣乃十一國。公羊之九國惟厲叛命。何以言九。推之楚詞九歌有十一篇。顏之推還冤志引周春秋曰。左儒九諫而王不聽。孫子云。善攻者動於九天之上。善守者伏於九地之下。以及九原九泉之類。莫不皆然。

繆公立三十九年而卒其後百有餘年而孔子論述六藝傳略
言易姓而王封泰山禪乎梁父者七十餘王矣

案秦繆卒後至孔子論述六藝幾百四十年而孔子又安得
有易姓封禪之言哉託諸孔子猶之嫁名管仲也

其於天下也視其掌詩云紂在位文王受命

附案漳南集辨惑曰指其掌孔子自指其掌而言耳直云其
於治天下也視其掌不已疎乎史詮曰詩當作書考證張氏
曰詩云二字不審所謂注家皆略蓋唐時無此文也視其掌
云爲句衍詩字盧學士曰說詩者以虞芮質成爲文王受命
之年史公所引卽此諸解以盧爲確至漳南所駁殊不然禮
記仲尼燕居曰治國其如指諸掌而已乎全一句法

武王克殷二年天下未寧而崩

案武王在位之年無經典明文可據此作二年漢書律歷志作八年并爲西伯十一年故廣宏明集載陶隱居年紀稱周武王治十一年也而詩幽風譜疏謂鄭氏以武王疾瘳後二年崩是在位四年疏又引王肅云伐紂後六年崩周書明堂解竹書紀年及周紀集解引皇甫謐並云六年管子小問篇作七年淮南子要略訓作三年路史發揮夢齡篇注合武王嗣西伯爲七年所說不全後儒多從管子如稽古錄外紀通志等俱是七年余謂當依周書爲近

是時萇引以方事周靈王諸侯莫朝周周力少萇引乃明鬼神事設射狸首狸首者諸侯之不來者依物怪欲以致諸侯諸侯不從而晉人執殺萇引周人之言方怪者自萇引

案左傳魯昭十一年萇宏始見魯昭十一爲周景王十四恐

未逮事靈王也。而以爲事靈王。誤一。宏之見殺。當敬王廿八年魯哀三年。而以爲殺於靈王時。誤二。郊祀志晉人殺後宏世至敬王時。十宏與于范中行之難。周人殺之以說於晉。固一字疑此或誤非爲致諸侯。亦非晉執而殺之。誤三。韓子內儲下及說苑權學紀聞十攷禮經設狸首以射諸侯之不朝者。乃是古有此辨其誣矣禮。宏特踵行之。而遂指稱方怪。誤四。藝文類聚五十九引金禮。宏特踵行之。而遂指稱方怪。誤四。禮云武王伐殷丁侯不朝。尚父責丁侯射之。丁侯病遣使請臣尚父拔箭丁侯愈亦此類以宏爲方怪。方士之言耳。故淮南汜論云。甚宏周室之執數者也。天地之氣。日月之行。風雨之變。律歷之數。無所不通。然不能自知。車裂而死。拾遺記言周靈王登昆昭之臺。甚宏招致二人乘雲而至。能變夏改寒。周人以宏幸媚而殺之。流血成碧。荒誕甚矣。莊子外物篇云。宏死於蜀。藏其血。三年化爲碧。亦妄。呂氏春秋必已篇亦有藏血三年化

碧之
語

其後百餘年秦靈公作吳陽上時

案敬王廿八年宏見殺威烈王四年秦靈作時首尾七十一年安得百餘年哉

合十七年而霸王出焉

案十七似當作七十說在周紀

其後百二十歲而秦滅周

徐廣曰去太史儋言時百二十年

案秦獻十八年作畦時爲顯王二年至赧王五十九年滅凡百十一年若數至滅東周則百十八歲卽依徐注亦不合其後百一十五年而秦并天下

附案鼎沒泗水據漢志竹書在顯王四十二年至秦并天下首尾一百七年恐非當與太邱社亡全在顯王三十三年也

八神一曰天主

附案凌稚隆程一枝謂天地兵日月陰陽四時者八神名也。主字舊屬下讀。據後禮祀地主之句。則八神名當在主字爲句矣。索隱本作天主。

天齊淵水居臨菑南郊山下者

附案淵水二字。御覽百六十引作泉名。恐非。山下當作山下。今本脫。索隱本作下。下可據。師古曰。下下謂最下也。

蓋天好陰祠之必於高山之下。小山之上。命曰時。

附案徐廣謂一云之下。時各本時字上多上字衍。命曰時。與漢志全。

地賢陽祭之必於澤中。圓丘云。

案下文亦云祠后土宜於澤中。圓丘祠地圓丘。不知出何禮經。豈非方士之談乎。

山皆在齊北

附案史記曰山指之罘之萊二山故云皆也今本山字屬上句誤

正伯僑充尚

附案相如大人賦揚雄甘泉賦正作征古字通師古曰仙人姓充尚漢志訛元尚

而黃金銀爲宮闕

附案初學記卷五卷六廿三藝文類聚六十二七十八及御覽八百十二引史銀上並有白字

過恒山

案恒字宜諱

而刻勒始皇所立石書旁

案刻卽勒也。殿本漢書考證齊氏召南曰：以始皇紀證之，疑是盡刻二字之訛。

昔三代之君

附案君乃居之謫。漢志作居。

恒山泰山

案恒宜避。

薄山者襄山也。

附案此山之名甚多。以山長數百里，隨地異名耳。但正義引括地志，襄作衰，音色眉反。宋祁校漢志云：襄山封禪書作衰山，與今本異。攷揚雄傳元古掌華蹈衰。蘇林曰：衰山也。宋祁曰：江鄰幾云：趙師民指中條山曰：此所謂襄山。揚雄賦：元華蹈襄。水經注：四李善：西京賦：竝作襄。檢余靖初校漢書監本作衰，馳

介問之云。據郊祀志。衰字誤矣。郊祀志云。襄山。史記却作衰山。徐廣云。蒲坂縣有衰山。今本注亦作襄則知二字紛錯久矣。又衰一作嶮。蕭該音義曰。該案說文字林。並無嶮字。未詳其音。請俟來哲。山在華東。而云自華以西。正義謂未詳。師古曰。今關鄉之南山。連延西出。竝得華山之名也。

岳山

附案岳乃垂字之誤。以形近致譌。地理志右扶風武功縣注云。太一山古文以爲終南。垂山古文以爲勢物。不然。岳山卽吳岳。此敘七名山。而下文復舉吳岳何耶。徐廣云。武功縣有太壹山。又有垂山。則知徐所見史記本是垂山矣。今史漢本誤作岳山。并誤以徐注太壹爲大壹。垂山爲岳山。師古注漢志謂岳山吳岳非一山之名。而以徐注岳山爲疑。師古所見

亦係史漢譌本故耳。但張衡西京賦於前則終南太一潘岳
西征賦面終南而背雲陽。又云太一龍嵒。李善注謂是二山
終南南山之總名。太一一山之別號。通鑑地理通釋亦然。胡
氏禹貢錐指辨之曰。終南止於盤屋。若盤屋以東無終南焉。
竊意太一垂山皆禹貢之惇物。後人改名。離爲二山。蓋垂山
卽太一之北峯。無二山也。俱在縣東。或謂終南綿亘甚廣。而
以武功之太一爲主峯。
故漢志云
然說亦通

吳岳

附案漢志作吳山。謂古文以爲汧山。水經注經典釋文亦然。
則知吳岳卽禹貢之嶧。周禮爾雅之嶽。國語管子之虞也。吳
通但地理通釋謂吳山在隴州吳山縣西南五十里。嶧山在
隴州汧源縣汧水所出。非一山也。閻氏疏證因之云。嶧山在

隴州西四十里唐六典隴右道名山曰秦嶺者是吳嶽在隴州南八十里六典關內道名山曰吳山者是二說其何從善乎雖指之言曰吳山漢志雖云在縣西而岡巒綿亘延及其南只是一山自周尊岍山爲嶽山俗又謂之吳山或又合稱吳嶽而岍山之名遂隱當以漢志爲正

蜀之汶山

附案一本山下有也字是

而四大家鴻岐吳岳

案言四大家而但舉三山當有脫

而雍有日月參辰南北斗熒惑太白歲星填星二十八宿風伯雨師四海九臣十四臣諸布諸嚴諸逮

漢志作逐之屬

附案劉奉世曰二十八宿旣已備而又言參與南北斗蓋衍

字也。義門讀書記曰：參卽參字，謂三辰也。仲馮誤以參昂當之。義門駁是。余謂南北斗雖已備於列宿中，而北斗居中爲尊，南斗在北宮水位，卽以代辰星，故敘熒惑五星，祇四星而獨無辰。且俗有南北斗主生死之說，故特祀之。劉言衍南北斗亦誤。師古小司馬竝云：九臣十四臣，不見名數所出。諸布諸嚴諸逐，未聞其義。昔賢皆不論，各本此處。九臣下有晉灼注曰：自此至天淵玉女凡二十六小神，不說殊不可解。

於社毫有三社主之祠

附案：漢志作杜毫有五社主之祠是也。此誤杜爲社，索隱知杜毫之誤社，而不言三社主之誤。蓋所見本非社耳。但漢志五字乃三之訛。攷地理志云：杜陵有社主祠四所，乃合杜毫三祠及下雍管廟言之，安得有五。

杜主故周之右將軍

附案周宣王殺杜伯事見國語墨子及還冤志然杜伯是國君非將軍也且宣王時安得有右將軍哉攷春秋傳晉使卿為軍將謂之將中軍將上軍將下軍雖有將軍之文未定將軍之官而其名實起於此自是之後遂以為官名故晉狐夜姑為將軍魏獻子為將軍趙文子問叔向晉六將軍墨子淮南此外楚有將軍子重將軍屈完將軍子常楚子孫序秦有三將軍紀秦本齊有諸將軍晏子將軍穰苴史本傳及衛有將軍文子張鄭有將軍詹伯吳有將軍孫武吳世家及本傳又黃池之會十旌一將軍國魯有將軍慎子孟又魯召子貢授將軍之印淮南其餘未可悉數而將軍尚無異名也惟國策梁王以故相為上將軍越范蠡為上將軍魏太子申為上

將軍楚屈句爲大將軍

並世家

但有上與大之異名而無前後

左右之稱也漢書百官公卿表云前後左右將軍皆周末官

殊未核夫自春秋至七國猶未聞有右將軍之名而況宣王

之世哉

後書南蠻傳帝嘗時有犬戎吳將軍水經注十五卷伯益爲百蟲將軍韓子外儲說左伯夷以將軍葬于

首陽山姜子述命將之言

蓋杜伯爲最小鬼之神者朱衣冠

而操弓矢厥狀甚武因以將軍目之右將軍者以右尊故也

然豈可以爲典要乎文粹載陸龜蒙野廟碑云甌粵間好事

鬼山椒水濱多淫祀其貌有雄而毅黝而碩者則曰將軍有

溫而愿哲而少者則曰某郎杜伯之稱右將軍類是

唯雍四時上帝爲尊

附案秦舊有六時而言四者索隱謂是密時上下時哇時西

廊二時不在雍故別祀不數則正義引括地志以廊時吳陽

上下時爲四固非。而下文西時哇時祠如其故語。必西時卽時也。哇字誤。哇時在櫟陽。亦不在雍。而列於四時之內者。以白帝合於炎黃青爲四。故高帝增黑帝而五也。

及四仲之月祠。若月祠陳寶節來一祠。

附案漢志云。四仲之月月祠。若陳寶節來一祠。此當衍上祠字。而移若字於陳寶上傳寫譌耳。

徇沛爲沛公則祠蚩尤。釁鼓旗。

附案釁鼓經有明文。而釁旗不見於經。以高紀校之。旗下似脫幟皆赤三字。釁鼓句絕。然孫侍御云。漢志亦作釁鼓旗。疑古有釁旗之典。呂氏春秋慎大篇有釁鼓旗甲兵語。

晉巫祠五帝東君雲中司命巫社巫族人先

漢志失先字

炊之屬

案司命是荆巫所祠。非晉巫之祠也。故漢志無之。索隱本釋

司命在下文則唐初尚無不知何時妄增當衍雲中下宜有君字族人上脫祠字當依漢志補師古曰巫社巫祠皆古巫之神也

秦巫祠社主

附案社乃杜之誤卽上文杜主

各有時月

附案漢志作時日是

常以春三月

案三月誤當依漢志作二月

是歲制曰朕卽位十三年於今

案此卽文紀十四年詔也故漢志不重載今詔辭旣增損與紀不全而又改十四年爲十三年何也

有司議增雍五時路車各一乘。駕被具西時。畦時。禺車各一乘。
案雍五時祠。白青黃赤黑五帝。攷秦襄公西時。文公酈時。獻
公畦時。俱祠白帝。宣公密時。祠青帝。靈公上時。祠黃帝。下時
祠炎帝。高祖北時。祠黑帝。則西酈二時。當與吳陽武時好時
均不在五時之數。蓋白帝不應有三時。且西時酈時非雍也。
而此載有司議加五時。禺車馬。更言西畦二時。豈其時取酈
時充五時之數。而以西時與畦時作別祠乎。疑與上文言畦
時全誤。上云西時時祠如雍錄以西時酈時上下時北時
為五。而吳陽武好兩時及密時畦時不與焉。不知何本。

以為漢乃水德之始

案始乃時之誤。餘說在文紀。

後三歲黃龍見成紀

案後三歲當依漢志作明年

其明年趙人新垣平

附案其明年三字當依漢志移於下文夏四月文帝親拜霸渭之上

北穿蒲池溝水

附案正義曰顏師古云蒲池爲池而種蒲也蒲字或作滿言其水滿恐顏說非案括地志云渭北咸陽縣有蘭池始皇逢盜蘭池者也言穿溝引渭水入蘭池也疑蘭字誤作爲蒲重更錯失各本正義皆有訛缺此校定

文帝出長安門

案安字誤當依漢志作長門爲是況下文明有長門五帝之語其誤審矣續郡國志長安有長門亭百官志長水校尉注

韋昭云水名。雍錄曰：霸水北流，別有長水。後因姚萇據有長安，人爲萇諱，改爲荆溪水，失其本名。雖以顏師古之博而亦不能政，故其注長水校尉曰長水，諱名也。郊祀志：文帝出長門，如淳注：亭名，亭以門爲名，而非城門之門。或古來嘗有扼塞在此，其門道尚存，如鴻門之類，其斯以爲門矣。而門之以長爲名，必取之長水，地近故也。竇太主獻長門園，武帝以爲長門宮，是竝長門亭而立此名也。水之因姚萇改名，韋述兩京記嘗言之。宋次道長安志皆本圖經，不知長水別爲一水，乃云長安城門無名，長門者此誤認門名而求之城門也。則雖司馬遷亦誤認長門亭而爲長安城門矣。故圖經誤竝城門以求，宋次道知之，其後自出其說曰：荆溪本名長水，後避姚萇諱改名，則韋述所著宋旣知之，而兩存不辨，故見者難

遂明耳。

其明年新垣平使人持玉杯上書闕下獻之。

案獻杯大誦日再中改元當在文帝十六年此誤書於後元年也已說見本紀中。

使人微伺得趙綰等姦利事。

案姦利二字史之曲筆也徐氏測議曰如漢書所言史尊天子之義也不爲姦利蓋有司以太后指坐之耳。

舍之上林中驪氏觀。

附案漢志作礪有啼斯二音師古以斯音爲是謂其字從石從麗則作驪者非矣。

此器齊桓公十年陳於柏寢。

案齊景公新成柏寢之臺見晏子春秋雜下篇桓公時安得。

有此臺乎少君甚矣

安期生食巨棗大如瓜安期生僊者

附案既言巨則不得複言大必是誤文漢志作食巨棗索隱亦引包愷云巨或作臣攷田僊傳論安期生與蒯通相善嘗以策干項羽則辨士之流卽其時見存亦不過八九十歲人安得以爲古之眞仙哉言食安期大棗猶言與九十餘老人之大父游射也韓子外儲左篇云鄭人有相與爭年者其一人曰我與黃帝之兄同年少君其類是歟藝文類聚八十七引史作大如舞

用太牢七日

附案史詮謂牢下當有具字然徐廣曰一云日一太牢具七日與漢志日一太牢七日合也

祠神三句一天一地一太一

附案史記曰天地太一所謂神三也。漢志缺神字。觀下文作

甘泉宮盡天地太一諸神可知矣。湖本讀祠神句。而以三一

天一地一太一為四神非也。蓋因有三一之神而誤。

太一澤山君地長用牛

附案漢志及補今上紀作皐山山君。此脫山字。志脫地長。索

皐山辭之非。湖徐廣曰。澤一作皐。澤與皐古通。詩九皐傳皐

本又說皐為皐。澤一作皐。澤與皐古通。詩九皐傳皐

澤也。列女傳皐陶之皐作皐。顏氏家訓書證篇所云皐分澤

片爾。又歷書引大戴禮誥志篇秘鳩先澤。禮作皐。皐無

解澤為澤。古釋澤。宋江休復雜志引此語云。夏英公文字中

用澤作坡澤之澤。江更引宋子京謝歷表。天官書太白章大

圖黃澤注音澤。皆可互證。或以澤為皐之誤。不然也。左傳襄

門釋文言或作皐。誤。然大雅無疏。疏作皐。門不得為

誤。水經潁水注澤坡。即古城皐亭是。亦一證也。

其後天子苑有白鹿以其皮爲幣以發瑞應造白金焉其明年郊雍獲一角獸若麟然有司曰陛下肅祗郊祀上帝報享錫一角獸蓋麟云

案獲麟在元狩元年而造白金及皮幣在元狩四年此誤也漢志刪其後天子廿一字改其明年爲後二年若麟當依漢志及補紀作若庶觀下文蓋麟之言可見矣攷元狩元年騶牙出建章宮後閣重樓中與獲麟全時此符瑞之一也故馬卿封禪書序云罔騶虞之珍羣頌云般般之獸樂我君囿馬班皆不載其事僅見褚生所續滑稽傳內又元狩元年作白麟歌元鼎四年作寶鼎天馬歌元封二年作瓠子芝房歌五年作盛唐樅陽歌太初四年作西極天馬歌太始三年作朱雁歌四年作交門歌史記太初自不及朱雁交門瓠子載河

渠書其餘白麟寶鼎芝房盛唐樅陽等歌皆宜入封禪書史公略而不載未知其故兩天馬歌宜入大宛傳亦不載

樂書後人

所籍不足據

然後五岳皆在天子之邦

附案漢志及補今上紀竝作天子之郡疑邦字乃郡之譌

上有所幸王夫人夫人卒少翁以方蓋夜致王夫人

附案史作王夫人故徐廣以趙之王夫人爲證見外戚世家

及漢外戚傳

各本係注有譌

而郊祀志及外戚傳却作李夫人潘岳

悼亡詩獨無李氏靈彷彿覩爾容白居易有新樂府李夫人

篇用漢書也但李夫人卒時少翁之死已久必漢書誤

晉葛洪抱

朴子論仙篇謂史記漢書又拾遺記謂是李少君致李夫人皆云李夫人乃記錄謬耳

於紗幕中唐陳鴻長恨歌傳亦作李少君皆誤以少翁爲李

少君耳而拾遺之誤從桓譚新論來李善注安仁悼亡引新
論曰李夫人死方士李少君言能致其神裴駰於補紀索隱
新論作王夫人此處引新論全與選注不合又索隱稱李少
翁謂出漢書少翁姓李漢書未見恐小司馬誤居易錄引拾
遺記作董仲君亦所未聞

天子病鼎湖甚

附案日知錄廿七謂湖當作胡宮名揚雄傳南至宜春鼎湖
是也然余攷史漢及黃圖水經注四皆作湖乃古通用字如
湖陵縣史漢多作胡陵風胡子吳越春秋作湖可證又漢志
京兆湖縣注云故曰胡武帝建元元年更名湖通典曰鼎湖
卽此

病良已大赦

案是年爲元狩五年不聞有大赦之事

置酒壽宮神君

案酒字衍補紀漢志無注更立此宮也。各本注中有誤脫

所以言行下

附案補紀作所欲者言行下漢志作所欲言行下錢唐汪繩祖曰所以當作以所譌倒耳

上使人受書其言命之曰書法

附案漢志作畫法孟康曰策畫之法也此與補紀作書法非正義書音獲尤非

三元以郊得一角獸曰狩云

史記攷異曰元光之後尚有元朔則元狩乃四元非三元班史改以爲今无三元字蓋得之矣建以斗建名光以長星名皆取天象元朔不主天瑞故不及耳說者謂建元元光此時

追命之恐未然

過雒陽下詔曰

案封周後詔與漢書武紀迥異何也

闕基基自相觸擊

附案此與漢志作基補紀作旗張守節謂旗本或作基故索隱引畢莒術正義引高誘淮南子注竝作基解而通鑑獨作旗考異引漢武故事證之云樂大嘗於殿前樹旂數百枚令旂自相擊緋緋竟庭中去地十餘丈觀者皆駭兩解均有據存參

昔禹疏九江

案江乃河之誤漢志是九河

又以衛長公主妻之

附案孟康云衛太子妹如淳云衛太子姊師古据外戚傳是姊以孟說爲非但帝女稱公主姊妹稱長公主此帝女而云長公主故裴駰曰未詳也索隱謂是衛后長女非如長公主之例此解甚通若劉敬傳稱魯元公主爲長公主外戚世家稱文帝女嫫爲長公主矣

齊金萬斤

案漢志作十萬斤

招視得鼎

附案漢書武紀水經注六言元鼎元年先已得鼎汾陰此元鼎四年爲重得之然封禪書郊祀志皆不載元年得鼎事必是誤出通鑑考異辨之矣

天地萬物所繫終也

案終字誤漢志作象是

禹收九牧之金鑄九鼎皆嘗烹醵

湖本誤絕爲句

上帝鬼神遭聖則興

鼎遷於夏商周德衰宋之社亡鼎乃淪沒伏而不見

案史公述有司議缺略不具當以漢志校之得失自見然周德衰下有鼎遷於秦秦德衰二語社亡鼎沒不在秦衰之時議者未免失詞又攷禹鑄九鼎雖不見於經典而相傳爲禹鑄易林小畜之益說文鼎部及杜注左傳王嘉拾遺記皆稱是禹惟墨子耕柱篇言夏啟所鑄并載白雲之謠恐單說不可信而金氏前篇因之何歟

有黃白雲降蓋若獸爲符

附案服虔云雲若獸在車蓋也晉灼云蓋辭也師古云二說非蓋發語辭也

顏即晉說

史詮云降蓋句即上文黃雲蓋焉是也

史詮說勝舊注

上幸雍且郊

附案上常稱也幸雍常事也祇因漢志偶脫幸字師古遂造爲雍地形高之說以上雍連釋而小司馬襲之何無識也

黃帝得寶鼎宛胸

附案宛胸地名卽濟陰宛句也而補紀作宛侯漢志作晁侯注家皆缺蓋見當作冤侯句音近路史國名紀六宛侯三皇時侯國

而神靈之封居七千

附案漢志居作君似非

黃帝上騎

案黃帝上騎與秦穆上天其妄一也何待於辨而風俗通正

失篇子華子問鼎篇極論黃帝升遐之謬迂矣

太一其所用如雍一時物

案其字衍

水而泊之

附案漢志作水而酒之是徐廣固云泊一作酒也

宜因此地光域

附案地輿域複徐廣於補紀及此書竝云地一作夜是也上文言夜有美光政合漢志亦誤仍史譌本

以象天一三星爲太一鋒

附案漢志作泰一縫旗下有靈旗句則此旗字宜省縫與鋒全宋祁謂淳化本作絳旗乃譌也天一漢志作太一非其方盡多不讎上乃誅五利

案正義引漢武故事云東方朔言樂大無狀上發怒乃斬之然則非盡因其方不讎之故也

其道非少寬假

附案漢志假作暇

琴瑟自此起

案琴字衍

釋兵須知

附案漢志作涼如徐亦作涼

三月遂東幸緱氏

案漢書武紀作正月荀紀通鑑全此與郊祀志作三月似誤頗以加禮

附案禮乃祠之譌

皆至太山祭后土

案補紀漢志皆至泰山然後去此作祭后土誤

於是制詔御史

案漢書武紀載詔辭與此異似當依武紀

奉車子侯暴病一日死

附案索隱引新論風俗通謂子侯乃武帝殺之梁書許懋傳亦言霍嬪見殺然不足信風俗通已論其誣矣

北至竭石

附案史記曰湖本竭作竭誤

有司言寶鼎出爲元鼎以今年爲元封元年

附案此文當在前羣臣更上壽句下錯簡也

望氣王朔言侯獨見旗星出如瓜

案此作旗星。漢志作填星。注家各依文解之。小司馬又以爲歲星。余謂皆非。當依補紀作其星出如瓠爲是。蓋卽指上文弗於東井三能之星也。以彗孛爲德星。猶以天旱爲乾封。阿諛無理。足供千古拊掌之資。

徙二渠復禹之故跡焉

案所復非禹跡也。說在河渠書。

今陛下可爲觀如緱城

附案徐廣云如緱氏城是也。補紀漢志竝有氏字。

甘泉則作益延壽觀

案漢志作益壽延壽館。師古謂二館名。攷注引漢武故事及括地志皆云延壽觀。更無益壽之名。三輔黃圖亦但云延壽。蓋此多一益字。漢志更多一壽字。師古注非。宋黃伯思東觀

餘論据雍繹間耕夫得古瓦其首作益延壽三字以爲觀名益延壽夫瓦之眞贋不可知既未足憑而益與延全義不應複出又其時竝作者蜚廉桂觀之屬或一字名或兩字名何以此觀獨三字名乎其爲衍文無疑真文類聚六十三引史是延壽觀

乃作通天莖臺

附案考要謂臺有銅柱謂之臺漢書特削莖字索隱亦疑莖爲衍未深考也柯氏此說甚謬凡臺皆有銅柱何獨通天臺乎况補紀酷吏傳及漢書紀志三輔黃圖竝無莖字余方欲衍之而乃以無莖爲非耶

登禮瀟之天柱山號曰南岳

附案武帝移南岳衡山之祀於霍山非禮也霍山卽天柱山在廬江潯縣西南謂之霍者爾雅大山宮小山曰霍也衡山

在長沙湘南縣南或謂衡山亦名霍恐非

其西則唐中

附案漢志作商中師古曰商金也於序在秋故謂西方之庭爲商庭据顏說則作唐中爲非然西都賦前唐中而後太液西京賦前開唐中固皆用唐中字也

官名更印章以五字

附案武紀云數用五定官名則此官名上似脫定字而漢志云官更印章以五字則又似多名字徐廣曰一無名字

獨五月嘗駒行親郊用駒

附案漢志無此語是旣以木禺馬代駒尚何五月嘗駒之有下文行過乃用駒是總上五時諸山川在內又何必兩言用駒乎其爲後人誤增無疑而補紀作五帝嘗駒尤謬此政指

五時之祠而五時卽五帝也。

上親禮祠上帝焉。

案補紀云上親禮祠上帝衣上黃焉。漢志云上親禮祠上偵黃焉。疑此上帝是上黃之誤。

封臣

附案上文臣棗誤作巨棗。此封巨又誤作封臣。南監本作巨字不誤。補紀及漢書人表郊祀志作封鉅。竝與巨全。

太山卑小

案太山上缺東字。

其後五年復至太山修封還過祭恒山。恒字直進今上封禪其後

十二乃三歲而還徧於五岳四瀆矣。

附案史公載武帝太初三年禪石闕後卽總敘所興諸祠而

以方士候神終焉。此前後三十三字乃後人妄增。史訖太初，安得敘至天漢已下乎？蓋漢志欲終武帝事，故連言云。其後五年復至泰山修封，還過祭恒山，自封泰山後十三歲而周徧於五岳四瀆矣。下又兩言後五年以終之。補今上紀者不知斷限，謬割漢志以續本紀，并增封禪書，遂令文義隔絕。注家豈未之察耶？或曰：後人不知補紀者是從截取漢志來，反認爲史記本文，因而增入此書也。

薄忌太一及三一冥羊馬行赤星五寬舒之祠官以歲時致禮。凡六祠皆太祝領之。

案漢志作五牀。地理志谷口縣有五牀山祠。此自薄忌太一至五牀凡六祠。蓋五字下誤脫牀字耳。索隱不知此爲誤脫，遂於補紀數薄忌太一至赤星爲五，而加以正太一后土祠。

爲六於此書云祠官寬舒議祠后土爲五壇故謂之五寬舒祠官無論岐頭別說自相齟齬而正太一及后土上文已別言之何得混入且卽其所稱薄忌太一也三一也冥羊也馬行也赤星也正太一也后土也凡七祠矣奚云六乎寬舒之祠官漢志謂六祠皆以寬舒爲祠官主之而領於太祝爾豈五壇之謂哉

行去則已

案行字衍補紀漢志無

河渠書第七

夏書曰禹抑洪水十三年過家不入門陸行乘車水行載舟泥行蹈毳山行卽橋

案夏書無十三年之文且與孟子不合四載之名亦與他書

異說在夏紀中至所稱夏書者以事關禹故引爲夏書也
同爲逆河入于勃海

案臣瓚謂禹貢夾右碣石入於河則河入海在碣石武帝元
光三年河徙東郡更注勃海禹時不注也瓚說不甚分明幾
疑河先不入勃海至元光徙流而始入勃海矣其實禹貢所
謂海乃東海在碣石之東其西則逆河卽世所稱勃海齊都賦海
旁出爲勃在天津衛此處勃字當衍蓋漢人以勃海爲海而不知其
爲逆河耳至其所以誤者逆河後皆漸於海南北兩岸苞淪
洪波因誤指勃海爲海而河入海之道遂不至碣石非禹舊
跡也禹貢雖指辨之甚悉

于楚西方則通渠漢水雲夢之野

湖本于楚連上句誤

案此通渠事諸書無考經史問答八引皇覽孫叔敖激沮水

作雲夢大澤之地。謂史公指此。然漢水雖一名沮水。恐叔敖是引沮水以入雲夢。與史所言通渠不全。似當闕疑。

東方則通鴻溝江淮之間。

案困學紀聞二云。吳之通水有二。左傳哀九年。吳城邗。溝通江淮。此自江入淮之道。吳語夫差起師北征。闕爲溝於商魯之間。北屬之沂。西屬之濟。在哀十三年。此自淮入汴之道。是江淮之通。固屬吳。馬班於此似有誤。王氏之言甚審。余謂此鴻字。因上文有鴻溝而誤增之。漢志無鴻字也。史證曰。鴻當作邗。蓋此溝卽邗溝。吳所掘以通江淮者。不得指爲滎陽之鴻溝。而況可以吳事移之楚乎。經史問答八。据水經注。謂楚亦有通江淮之事。引左傳。楚人伐隨。師於漢淮。爲證。此又一說。

於吳則通渠三江五湖。

附案通湖於江禹貢雖指六引明韓邦憲廣通埧攷謂吳王閻廬伐楚用伍員計開渠運糧卽今高淳縣之胥溪也漢唐來言地理者以爲水源本通蓋指吳所開者爲禹貢三江故道爾然墨子云禹治天下南爲江漢淮汝東流注之五湖則周末已誤以後世溝通江湖之道爲禹迹矣況漢唐乎

西門豹引漳水溉鄴

附案引漳水溉鄴溝洫志据呂氏春秋樂成篇以爲史起有史起譏豹不知漳水溉田語續滑稽傳謂豹引河水溉鄴也然攷後漢書安帝紀初元二年正月修理西門豹所分漳水爲支渠以溉民田水經注十云魏文侯以西門豹爲鄴令引漳以溉鄴民賴其用其後至魏襄王以史起爲鄴令又堰漳以溉鄴田與此書相合呂子恐不足據蓋二人皆爲鄴令皆

附案班酈竝作菱師古曰字宜從竹而說文繫傳引此書作菱蓋傳寫譌菱也如淳以菱爲草索隱謂一作菱竝非

而道河北行二渠復禹舊迹

案上文言禹廐二渠以引河北載之高地蓋禹分二渠自黎陽宿胥口始其一引而北爲大河之經流其一東流爲漯川

自周定王五年河徙之後

河徙見漢志王橫所引周譜

遂從宿胥口東行

漯川孟康所謂出貝邱西南王莽時遂空者卽水經大河故瀆一名北瀆是也武帝所道乃行漯川之北瀆安得以商竭周移之變道指爲酈東之禹河史不書河徙已屬疎略而此與封禪書竝稱武帝道二渠復禹迹豈史公明知非禹所穿而以武帝自多其功姑妄紀之乎

而關中輔渠靈輒

案漢志靈軹有成國漳渠攷地理志靈軹渠在盤屋成國渠在鄒皆屬扶風所謂輔渠也而漳渠無徵如淳曰水出韋谷引堵水

附案堵乃諸之誤徐廣曰一云諸川

東海引鉅定

日知錄廿六曰河渠書東海引鉅定漢書溝洫志因之東海疑是北海之誤地理志齊郡縣十二其五曰鉅定下云馬車濱水首受鉅定東北至琅槐入海又千乘郡博昌下云博水東北至鉅定入馬車濱而孝武紀云征和四年行幸東萊臨大海上耕於鉅定還幸泰山修封計其道里亦當在齊去東海遠矣

平準書第八

更令民鑄錢一黃金一斤

附案漢志及索隱本黃上無一字方氏補正曰一黃疑當作十貫以字形相近而誤王孝廉曰黃疑萬字之譌王說較方爲長

以稽市物踊騰糶

附案補正謂稽畱市物俟物價騰踊而後糶之非也踊糶皆誤字依漢志作痛騰躍爲是師古曰痛字或作踊誤踊騰一也不當重累言之而糶者出賣米粟之名市物繁多豈止稽畜米粟觀下文米與馬並舉可見且方言稽物亦不應言糶後有物故騰躍語益足徵糶字之譌

彭吳賈滅朝鮮置滄海之郡

案漢書食貨志作彭吳穿穢貊朝鮮置滄海郡顏師古司馬

貞竝云彭吳人姓名。但朝鮮傳無彭吳。其事絕無依據。此處賈字更不可解。索隱本無賈字也。況滄海郡武帝元朔元年置。三年因穢貊內屬置爲郡。非以兵滅之而滅朝鮮在元封三年。置真番臨屯樂浪元菟四郡。始元五年臨屯真番罷則滅朝鮮置滄海。判然兩事。相去二十一年。安得合而言之。史漢皆有誤。或謂彭吳必穿穢貊者。當云彭吳滅穢貊置滄海之郡。衍賈字朝鮮字亦欠安。

東至滄海之郡

史詮曰。漢志至作置。

甯蹠無所食

盧學士曰。凌氏疑有缺文。今案漢書武紀作受爵賞而欲移賈者無所流馳。此處似誤。

免減罪

案減字漢志作減是

級十七萬凡直三十餘萬金

案武功爵十一級臣瓚引茂陵書可据與舊爵有二十級不全索隱謂級十七萬合百八十七萬金而此云三十餘萬金其數必有誤誠哉是言師古劉攽之說皆非蓋買爵必循級而上不許越等故價以十七萬爲例無所增也

於是漢發車二萬乘迎之

案漢志作三萬兩

初先是往十餘歲

案初先是往四字疊用殊乖文義當依漢志作先是十餘歲河決觀

附案觀乃灌之譌。漢志是灌字。連下梁楚之地作一句讀。徐廣以爲縣名非。

自孝文更造四銖錢至是歲四十餘年

案鑄四銖錢在文帝五年。至孝武元狩四年造白金皮幣。凡五十七年。此云四十餘年非也。又文帝鑄四銖錢後。建元元年壞四銖行三銖。建元五年罷三銖行半兩錢。至元狩四年始改用白金皮幣。何嘗五十餘年皆用孝文四銖錢哉。漢志亦仍此誤。

而姦或盜摩錢裏取鎔

附案他本鎔作鎔。是。漢志亦作鎔。說文銅屑也。此與下鎔字全誤。師古依說文音浴。宋祁音俞玉反。今北人讀若裕。徐廣音容非。上文如淳注作取鎔亦譌刻。

天用莫如龍地用莫如馬

附案後書馬援傳注引史作在天莫如龍在地莫如馬

故白金三品其一曰重八兩圓之其文龍名曰白選漢志作撰

撰據大傳也直三千二曰重差小索隱本作以重差小方之其文馬

直五百三曰復小楮之其文龜直三百

劉奉世曰白撰當在其一日之下衍名字漢志名白撰無曰字故云衍名字若

此文當衍名曰二字二曰三曰之下皆當有金名史文錯脫

年十三侍中

附案陳氏測議謂桑宏羊年十三而精計算以爲異人劉晏

亦早慧

其明年大將軍驃騎大出擊胡

案此所云明年者乃元狩四年也但上文言是歲造皮幣白

金皆是四年事則此明年誤矣

周郭其下令不可磨取銘焉

附案漢志下作質義竝得通銘乃銘之譌說見上

欽左趾

附案欽字從大不從犬此譌刻集解引史記音隱曰欽徒計反小司馬索隱後序有音隱五卷不記作者何人此所引音隱各本訛作音義惟毛本不誤

自造白金五銖錢後五歲赦吏民之坐盜鑄金錢死者

案漢書武紀元狩四年造白金五年行五銖錢元鼎元年赦天下首尾纔四年耳五當作三

守相爲吏者

案吏乃利之誤

湯奏異當九卿

附案漢志作當異是也

自是之後有腹誹之法以此

附案此字乃比之譌師古漢志注曰則例也以字當衍

鑄鐘官赤側

附案漢志脫鐘字攷百官表水衡都尉之屬有鐘官古鐘鐘通用

主鑄錢者卽下文所說上林三官之一

徙奴婢衆

附案他本多作徒與漢志全此譌

人或相食方一二千里

案漢志作二二千里

欲畱之處

附案別本之字多作畱。與漢志全義門讀書記曰欲畱畱處之字乃寫作二點。傳誤作之。

縣治官儲

附案漢志官作官是。

赦天下

案漢志作赦天下囚。此缺。

因南方樓船卒二十餘萬人擊南越

案南越傳及漢書武紀擊南越樓船十萬人。此非也。漢志仍其誤。

數萬人發三河以西騎擊西羌

案漢志無數萬人三字。似當衍。卽有亦宜在騎字下。而武紀是十萬人。

初置張掖酒泉郡

案武紀元狩二年匈奴昆邪王來降以其地爲酒泉郡與武威郡共置地理志謂酒泉郡太初元年開武威郡太初四年開者誤也元鼎六年分武威爲張掖郡與分酒泉爲敦煌郡共置地理志謂張掖郡太初元年開敦煌郡後元年分者誤也元下又而此書謂置張掖酒泉皆在元鼎六年不但以酒泉之建誤居於張掖之後且以分置之張掖誤全於始置之酒泉矣而漢志亦仍此誤

金六十斤

案漢書志傳皆作黃金四十斤

不敢言擅賦法矣

附案擅字誤漢志作輕亦非當依徐廣作經

而桑弘羊爲治粟都尉

劉敞曰大司農舊治粟內史宏羊爲驥粟都尉也

令遠方各以其物賈時商賈所轉販者爲賦

案貴時當依漢志作如異時

弘羊又請令吏得入粟補官

附案漢志作令民得入粟補吏恐非觀下文云令民能入粟甘泉各有差以復終身則此當是吏入粟補官矣

亨弘羊天乃雨

附案史詮引方農部云事似未終疑有缺文史記考要云所敘武帝事未竟而遷死不得成就其書故其文止於亨宏羊天乃雨或謂遷用亨宏羊結以斷武帝之罪殊非本旨

太史公曰農工商交易之路通

附案明程敏政明文衡載趙汭讀貨殖傳云書首言秦之弊高祖重本抑末輕徭薄賦故文景之世國家無事百姓給足府庫充實人人自愛而重犯法後面序武帝事節節與前相反至論始推唐虞三代以來而舉戰國秦皇功利之禍爲證則武帝不能法祖宗之仁厚而蹈始皇之覆轍不待譏議而可見學者先讀此論而後讀其書使先後相承則太史公之意瞭然矣方氏補正亦曰七書皆依世次順序以其事歷代之所全平準乃武帝一時之法故序上古及秦綴於書後體當然也而史記考要謂此乃平準之發端後人截首一段爲書末之論史詮又謂此論當分爲二節自農工商至卒并海內乃平準之首序自虞夏之幣至曷足怪焉則平準之論也皆非是

時極而轉

附案徐廣時一作衰當是也

魏用李克盡地力

案李克魏賢臣豈盡地力哉盡地力者李悝也漢藝文志法家有李子三十二篇卽是李悝此與貨殖傳全誤作李克索隱於貨殖傳辨之矣

一國之幣爲三等

案徐氏測議謂名爲三等而止敘其二不及中幣恐三字誤而不知三字乃二字之誤漢志是二等也

書二卷男衆校

史記志疑卷十六終